

■ TRIBUNA POLITICA

Il sport sco scola per la vita

DA MARTIN JÄGER.
CUSSEGLIER GUVERNATIV

Far sport regularmain ed en moda raschunaivla mantegna la sanadad e fa plaschair. Tenor in studi cun il titel «Sport Schweiz 2014» vala la populaziun grischuna sco surproporzionalmain sportiva. Quai vala fin oz e ma legra zunt fitg sco «minister da sport» da noss chantun uschè multifar. Però na dat quai er betg da smirvegliar. Il Grischun porscha bain las premissas idealas per far sport, e quai directamain davant nossas portas: Ir cun skis, ir cun velo, viandar fin giugar hockey sin glatsch u far gimnastica en in'uniun da gimnastica. Per la gronda part da las disciplinas da sport existan purschidas tar nus, savens schizunt fitg bleras e fitg differentas, uschia che tuttas e tuts chattan ina che plascha.

Cun il sport en general – saja quai il sport da scola, il sport da massa u il sport d'elita – vegn savens cumbinada la noziun da la «scola per la vita». L'antieriur cusseglier federal Adolf Ogi ha designà il sport ina giada schizunt sco la meglra scola per la vita: «Gudagnar senza vegnir arrogant, perder cun dignitad, accep-



tar las reglas, respectar l'adversari, s'integrar en in team.» Mintga uffant duaja pudair far questas experientschas.

Il sport collia culturas e generaziuns, pli e pli daventa el er in factur da l'integrasiun sociala e linguistica. Il sport na munta dentant betg per se il medem sco coesiun sociala. Quai vala mo sche differents cundiziuns sco la stima da sasez e da l'adversari sco er il respect da princips etics vegnan er propi observadas. Displaschailmain sa mussan ozendi memia savens er ils aspects negativs dal sport (d'elita) sco il doping, l'engion u la violenza. Ils motifs per quai èn per exempel memia bler squitsch da prestaziun, il fanatissem per part fitg ferm u er la gronda preschientscha da tschertas disciplinas da sport en las medias.

Er sche nus na chattain betg savens tals excess negativs en il sport qua en il Grischun: la lavur da scleriment è tuttina impurtanta. En l'art. 27 da l'ordinaziun davart la promoziun dal sport e dal moviment che la regenza ha relaschà avant dus onns statti per exempel: «Prestond ina prevenziun cumbatta il chantun cunter ils fenomens secundars negativs dal sport. En spezial realisescha el ils programs da prevenziun da la confederaziun e da la federaziun da tetg dal sport svizzer.» Latiers tutga tranter auter er il program «cool and clean – per in sport fair e net» che nus realisain cun agid d'ina col-lavuratura da la partiziun sport da l'uffizi per la scola populara ch'è vegnida engaschada aposta per quai. Nus sustegnain e cussegliain en quest connex ils organisaturs da curs da sport per giuvenils e d'occurrentas da sport sco er ils gestiunaris da stabiliments da sport che s'engaschan en il rom dal program. La finamira da nossa promoziun chantunala dal sport è quella da svegliar adina puspè da nov tar uffants e giuvenils il plaschair vi dal sport fair ed il plaschair da sa mover.